



ODRASTANJE I UČENJE U PORODICI

Prva i najvažnija faza učenja u dječijem životu odvija se u porodici. Djeca uče iz postupaka drugih prema njima, iz onog što vide, čuju i doživljavaju od prvog trenutka kad se rode. Djeca su prirodni učenici i u periodu od rođenja do pete godine ona rastu i uče najbrže u svom životu.

Načini učenja

Postoje mnogi načini učenja. Djeca uče gledajući, slušajući i, naročito, radeći. Djeca prolaze kroz brojne faze ali među djecom postoje razlike u svakoj od tih faza. Isto tako postoje razlike i u dužini vremena koje je djeci potrebno da pređu iz jedne faze u drugu.

Djeca će napredovati u sredini koja je interesantna i u kojoj se osjećaju voljena i sigurna.

Samopoštovanje

To je najvažnije da se nauči - to je učenje o tome ko si ti kao ličnost i šta ti misliš sam o sebi. Osjećanje da smo cijenjeni, željeni i poštovani navodi nas da formiramo lijepo mišljenje o sebi i budi u nama samopouzdanje. Kad djeca jedanput steknu ovo samopouzdanje ona mogu pokušavati nove stvari, istraživati svoj svijet, izlaziti na kraj s onim što im ne ide dobro i osjećati da imaju šanse za uspjeh.

Vi ćete pomoći svojoj djeci da izgrade samopoštovanje ako im:

- pokažete da su ona vrijedna ljubavi i da su voljena,
- pomognete u pokušajima da urade nešto novo,
- pokažete da Vam je drago biti s njima i da želite provoditi vrijeme s njima,
- pomognete da nauče nove vještine i pohvalite ih kad iste isprobavaju.

Društveni razvoj

Vaša djeca počinju da uče o osjećanjima i o ophođenju s drugim ljudima mnogo prije nego što se razvije njihova sposobnost društvenog ponašanja.



Vi ćete pomoći svojoj djeci:

- da uče o osjećanjima tako što ćete im objasniti rezultat nečeg što se dešava, na pr.: "To me rastužuje, ljuti ili čini sretnim",
- da uče o osjećanjima objašnjavajući im kako drugi mogu da se osjećaju, na pr.: "Tvoja mi vika para uši",
- da uče kako da se slažu s drugima kad se Vi brinete o drugima i o tome kako se osjećaju Vaša vlastita djeca,
- razgovarajući s njima i objašnjavajući im šta i zašto nešto radite,
- dopuštajući im da počnu pomagati u kući i da učestvuju u brizi za kuću; da donose poštu, hrane životinje,
- ne tražeći od njih da s drugima dijele svoje stvari prije nego što su oni spremni na to. Za mlado dijete to ne izgleda kao dijeljenje - to njima izgleda kao da Vi uzimate njihove stvari.